



CENTRALE BANK VAN ARUBA

BCA a mantene e reserva obligatorio na 25,5 punto di porcentahe entrante 1 di februari 2023.

Relato di prensa


Conforme e tarea di e Comite di Maneho Monetario (CMM) pa evalua, determina y duna transparencia riba e accionnan di maneho monetario di Banco Central di Aruba (BCA), BCA ta comunica lo siguiente. Durante e reunion di 13 di januari 2023, CMM a dicidi pa mantene e tasa di e reserva obligatorio na 25,5 por ciento entrante 1 di februari 2023. Di e manera aki, e banconan comercial mester tene un balansa minimo na BCA cu ta igual na 25,5 por ciento di e depositonan riba termino cortico di nan clientenan. E decision pa mantene e reserva obligatorio na 25,5 por ciento ta basa riba e caida continuo den likides excesivo na e banconan comercial, aunke na un velocidad mas abou desde juli 2022, CBA lo sigui monitoreo e desaroyo den likides excesivo den e siguiente lunanan y lo por dicidi di cambia e tasa di reserva obligatorio atrobe, si ta considera esaki necesario.

E CMM a considera e siguiente informacion y analisis den su deliberacion:

Reservanan internacional y oficial

E reservanan internacional, cu ta consisti di reservanan oficial di BCA y reservanan di divisa na e banconan comercial a subi cu Afl. 111,6 miyon te cu 30 di december 2022, compara cu fin di december 2021 (Grafico 1). E reservanan oficial a expande cu Afl. 46,0 miyon, mientras cu e reservanan na banconan comercial a subi cu Afl. 65,6 miyon. Consecuentemente, te cu 30 di december 2022, e reservanan oficial y internacional a suma Afl. 2.790,9 miyon y Afl. 3.241,2 miyon, respectivamente.

Sostene un nivel adecua di reservanan ta critico pa mantene e tasa di cambio fiho entre e florin Arubano y e dollar Mericano. Teniendo cuenta cu esaki, reservanan internacional a keda ampliamente riba e rekisito di tres luna di pago riba e cuenta coriente di e balansa di pago durante 2022. E pagonan riba e cuenta coriente di e balansa di pago ta consisti, entre otro, di pagonan pa importacion, pagonan di interes na inversionistanan stranhero y transferencianan pa exterior manera placa manda afo door di trahadonan stranhero. Reservanan oficial tambe a keda dentro di e margen aceptabel basa riba e metrico 'Assessing Reserve Adequacy' (ARA) di e Fondo Monetario Internacional (FMI) (Tabel 1).



Tabel 1: Metriconan relata na reservanan observa den 2022

	jan	feb	mar	apr	mei	jun	jul	aug	sep	oct	nov	dec
Cobertura di pagonan riba cuenta coriente ¹	8,8	8,7	9,4	9,3	9,2	8,8	8,8	8,4	7,8	7,6	7,7	7,7
Metrico di FMI ARA ²	124,0	124,0	124,0	119,0	119,0	119,0	117,6	117,6	117,6	111,2	111,2	111,2

¹ E cantidad di luna di pagonan riba cuenta coriente cu e reservanan internacional ta cubri.

² E proporcion entre e nivel di reservanan oficial y e nivel minimo adecua (conforme FMI), den porcentonan.


Inflacion

Na november 2022, inflacion, final di luna midi contra e luna di e aña anterior, a baha di 7,0 por ciento den e luna anterior te na 6,6 por ciento (Grafico 2). E aumento den e Prijs di Consumo (IPC) tabata causa door di e crecimiento den prijs di utilidad, cu a afecta e componente di ‘vivienda’ (contribuyendo cu 2,7 punto di porcentahe). Tambe e prijs di gasoline a subi, cu na su turno ta influencia e componente di ‘transporte’ (contribuyendo cu 1,7 punto di porcentahe), mientras cu prijsnan den e componente ‘cuminda y bebida no alcoholico’ tambe a aumenta (contribuyendo cu 1,4 punto di porcentahe).

E inflacion midi riba promedio di 12 luna a subi te na 5,3 por ciento, compara cu 5,1 por ciento na october 2022. E presion inflacionario tawata debi na e nivel eleva di prijs di petroleo riba mercadonan internacional y e aumento den prijs di awa y coriente desde augustus 2022. Ademá, Aruba a importa un gran parti di e aumentonan den prijs for di su partnernan di exportacion, particularmente Estados Unidos y Europa.

Mientrastanto, na november 2022, inflacion basico (excluyendo cuminda y energia) a alcanza 2,2 por ciento si midi e final di respectivo luna contra e mes un luna di e aña anterior. Basa riba un promedio di e ultimo 12 lunanan, inflacion basico tambe a yega na 2,2 por ciento.


Grafico 2. Inflacion basa riba e indice di prijs di consumo di Aruba
(Fuente: CBS, november 2022)



Likides excesivo na banconan comercial

E total di likides excesivo na e banconan comercial a baha di Afl. 1.320,5 miyon na december 2021 te na Afl. 796,9 miyon na november 2022 (Grafico 3). E caida den likides excesivo ta debi principalmente na e subidanan consecutivo den e tasa di reserva obligatorio durante e periodo di januari 2022 te cu juli 2022. Ademá, data preliminar pa december 2022 ta indica un caida adicional den likides excesivo. Na fin di december 2022, likides excesivo ta estima di a cai te na Afl. 787,8 miyon. Sinembargo, likides excesivo a permanece riba e nivel di prome cu e pandemia na februari 2020 (+Afl. 989,7 miyon) y riba e nivel cu e banconan comercial posibelmente ta desea di tene pa motibonan

di cautela. Data preliminar ta muestra cu likides excesivo, kitando prestamonan cu no a wordo distribui y otro compromisonan a yega te na Afl. 309.4 miyon na december 2022.



Banco Central di Aruba
16 februari 2023